

四庫全書

子部

欽定四庫全書

冊府元龜卷九百六十六 宋 王欽若等撰

外臣部

繼襲

小雅著似續之訓春秋有世及之義蓋所以象賢濟美
克承基緒者也雖復要荒之外戎蠻之國亦乃崇樹世
嫡襲其位號傳國延祚享年永久其間知人如宋宣讓
國如魯隱愛才如吳謁得位如晉文雖曰夷狄有足稱

者自餘女子為後彊臣逆取是不一姓何常之有系而
言之亦所以紀其興滅之迹矣

東夷朝鮮自武王封箕子其後四十餘年至朝鮮侯準
自稱王漢初燕人衛滿擊破準而自王朝鮮傳國子孫
右渠

高句驪漢初其王高朱蒙死子如粟立如粟死子莫來
立漢武既滅朝鮮以高句驪為縣王莽更名下句驪侯
後漢建武八年遣使朝貢光武復其王號裔孫宮建光

元年死子遂成立遂成死子伯固立伯固死有二子長子拔竒小子伊夷摸拔竒不肖國人便立伊夷摸為王伊夷摸死子位宮立始位宮曾祖宮生而目開能視國人惡之及長凶虐國以殘破及位宮亦生而視人高麗呼相似為位以為似其曾祖宮故名位宮其後位宮玄孫乙弗利立乙弗利死子釗立釗為百濟所殺至後魏大武時釗曾孫璉遣詣安東奉表貢方物封璉為遼東郡公高句驪王太和十五年璉死年百餘歲孫雲立神

龜中雲死世子安立安死子延立延死子成立成死子
湯立周武帝封湯為遼東王隋高祖改封高麗王湯死
子元嗣唐高祖武德二年元弟建武遣使朝貢貞觀十
六年西部大人蓋蘇文殺建武立其弟大陽子藏為王
十七年太宗封藏為遼東郡王儀鳳中改朝鮮王永淳
初藏卒垂拱二年封藏孫寶元為朝鮮郡王聖歷元年
改為忠誠國王後唐同光天成中其王姓高長興三年
其王曰王建晉開運二年建卒子武嗣漢乾祐末武卒

子昭立

百濟晉義熙十二年封其王餘映為百濟王宋元嘉七年其王餘昆復修職貢以映爵號授之昆死子慶代立慶死子牟都立牟都死子牟大立梁普通二年其王餘隆遣使朝貢五年隆死子明襲其王號北齊武平元年以其王餘昌為百濟王隋開皇中昌死子璋立唐高祖武德七年冊為帶方郡公百濟王貞觀十五年璋卒子義慈遣使告哀太宗冊義慈襲其王號顯慶五年左衛

大將軍蘇定方大破其國虜義慈及太子隆送於京師
龍朔元年百濟僧道琛舊將福信遣使往倭國迎故王
子扶餘豐立為王高宗命帶方州刺史劉仁軌討之詔
以扶餘隆為熊津都督遣還本國儀鳳二年進帶方郡
王其百濟本地漸為新羅所據隆不敢還遂卒則天以
其孫敬襲封帶方郡王

新羅王本百濟人自海逃入新羅遂王其國傳世三十
至金真平隋開皇十四年封樂浪郡公新羅王唐貞觀

五年真平卒無子立其女善德為王襲樂浪郡公新羅
王號二十一年善德卒立其妹真德為王永徽五年真德
卒弟相國金春秋嗣龍朔元年春秋卒詔其子太府卿
法敏嗣開耀元年法敏卒其子政明嗣天授三年政明卒
其子理洪嗣長安二年理洪卒立其弟興光為新羅王
開元二十五年興光卒其子承慶襲天寶二年承慶卒其
子憲英襲大曆二年憲英卒其子乾運襲建中四年乾
運卒無子國人立其上相金良相為王貞元元年良相

卒立上相敬信為王襲其官爵敬信良相從兄弟也十四年敬信卒其子先亡國人立敬信嫡孫俊邕為王十六年後邕卒其子重興立元和七年重興卒立其相金彥昇為王太和五年彥昇卒其子景徽嗣後唐同光元年其王金朴英長興四年權知國事金溥並遣使朝貢倭國後漢光和中女王名卑彌呼魏正始中卑彌呼死更立男王國中不服更相誅殺復立卑彌呼宗女臺與為王其後復立男王並受中國爵命晉安帝時倭王

贊死弟彌立彌死子濟立宋元嘉二十年濟死世子興立興死弟武立隋開皇二十年其王姓阿每字多利思北孤號阿革雞彌遣使朝貢

南越王趙佗漢高帝十一年立為南越王建元四年佗卒孫胡為南越王胡薨太子嬰齊立先是嬰齊入宿衛在長安時取邯鄲穆氏女生子興及即位上書請立穆氏女為后興為嗣及嬰齊薨太子興代自尉佗王凡五世九十三歲而亡

閩越王無諸漢高帝五年立為閩越王王閩中故地建
元六年其王郢擊南越為其弟餘善所殺詔立無諸孫
繇君丑為越繇王奉閩越先祭祀餘善已殺郢威行於
國國人多屬竊自立為王繇王不能制天子聞之因立
餘善為東越王與繇王並處元封元年
為漢所滅

東海王搖漢惠帝三年立為東海王都東甌世從號為
東甌王後數世為閩越所滅

林邑國漢末象林縣功曹姓區有子連殺令自立為王

子孫相承其後王無嗣外孫范熊代立熊死子逸立南
齊時夷人范當根純篡奪林邑自立為王後林邑王范
陽邁子孫范諸農率種人攻當根純復得本國梁天監
九年其王范天凱立十三年病死弼毳跋摩立唐武德
六年其王曰范至貞觀四年其王曰范頭黎並遣使朝
貢頭黎死子范鎮龍代立鎮龍為國人所殺乃立頭黎
女婿婆羅門為王後大臣及國人感思舊王乃廢婆羅
門而立頭黎之嫡女為王一說永徽總章中其王曰鉢

迦舍跋摩先天開元中其王建多達摩天寶中其王盧
陀羅並遣使朝貢至德後改稱環王國不以林邑為號
永泰元年林邑王諸農入朝海中遭風溺死代宗以其
子文欵為假節都督緣海軍事安南將軍林邑王

赤土國其王姓瞿曇氏名利富多塞稱其父釋王位出
家為道傳位于利富多塞

朱江國其王姓刹氏名質多斯那自其祖漸已強盛至
質多斯那遂兼扶南而有之質多斯那死子伊奢那先

代立

西南夷東謝蠻其首領謝元深世為酋長唐貞觀三年
元深與南謝首領謝強來貢貞元十三年西南蕃大酋
長繼襲蠻州刺史宋鼎左右大首領邛州刺史謝汕隨
牂牁朝貢

西趙蠻首領趙氏世為酋長唐貞觀三年以其地置明
州首領趙磨為刺史

牂牁蠻首領謝龍羽唐武德三年投牂州刺史封夜郎

公開元十年大酋謝元齊死詔立其孫嘉藝襲其官封
二十五年大酋長趙君道來朝貢貞元七年授其酋長

趙主俗官

南詔王姓蒙氏唐初有蒙舍龍生迦獨龐迦獨生細奴
羅高宗時來朝細奴邏生邏盛則天時來朝開元初邏
盛死子盛邏皮立盛邏皮死子皮邏閣立玄宗封越國
公賜名歸義其後破洱河蠻以功冊授雲南王天寶七
載歸義卒詔立子閣羅鳳襲雲南王大歷十四年閣羅

鳳死子迦異先死乃立迦異子是為異牟尋元和三年
異牟尋死冊其子驃信蒙蒙閣勸為南詔其後有龍蒙
盛蒙筊顛皆為南詔

西羌無弋爰劍者秦厲公時諸羌推以為豪其後世
為豪從爰劍種五世至研研最豪健自後以研為種號
十三世至燒當復豪健其子孫更以燒當為種號自燒
當至玄孫滇良世居河北大允谷滇良死子滇吾立滇
吾降漢子東吾立乃入居塞內

氏者西夷之別種後漢建安中有揚騰者為部落大帥騰子駒徙仇池地方百頃因以為號魏拜為百頃王至其孫名飛龍無子養外甥令狐戊搜為子晉元康中羣氏推以為主愍帝以為驃騎將軍封左賢王戊搜死子難敵統位自號左賢王屯下辯弟堅頭分部曲號右賢王屯河池難敵死子毅立自號左賢王下辯公以堅頭子槃為右賢王河池公毅族兄初襲殺毅并有其眾自立為仇池公永和十年改封初為天水公十一年初為小弟

宋奴所殺初子國誅宋奴復自立為仇池公十二年國
從叔俊復殺國自立國子安奔苻生俊乃稱藩於晉及
死子世自立為仇池公太和三年以世為秦州刺史弟
統為武都太守世死統廢世子纂自立纂黨襲殺統自
立為仇池公遣使詣闕簡文帝以纂為秦州刺史咸安
元年苻堅遣楊安伐纂克之徙其民於關中空百頃之
地先是宋奴之死二子佛奴佛狗逃奔苻堅堅以女妻
佛奴子定拜為尚書領軍堅之敗定奔隴右徙居歷城

招夷夏千餘家自稱龍驤將軍仇池公稱藩於晉孝武
以為秦州刺史後魏登國四年遂有秦州之地號隴西
王後為乞伏乾歸所殺無子佛狗子盛先為監國守仇
池遂襲位自號征西將軍秦州刺史仇池公謚定為武
王義熙初以盛為征西大將軍仇池公盛死私謚曰惠
文王子玄統位始光四年拜玄為征西大將軍北秦州
刺史武都王玄死私謚孝昭王子保宗統位初玄臨終
謂弟難當曰今境候未寧方須撫慰保宗冲昧吾授卿

國事其無墜先勲難當固辭請立保宗以輔之保宗既立難當妻姚氏謂難當曰國險宜立長君逆事孺子非久計難當從之廢保宗而自立太武拜難當為征南大將軍秦梁二州刺史南秦王難當為宋將裴方明所敗棄仇池奔上邽太武遣中山王辰迎之方明既尅仇池以保宗弟保熾守之河間公齊擊走之氏羌立保宗弟文德屯于濁水太武遣中山王辰迎之文成時拜難當營州刺史卒諡曰忠和子小眼襲爵例降為公拜天水

太守卒子公熙襲爵初宋將裴方明既尅仇池以保宗弟保熾守之尋為後魏河間公齊擊走氏羌立保宗弟文德屯於濁水又為皮豹之所擊保宗之執也子元和奔宋以為武都白水太守元和據城歸順文成嘉之拜征南大將軍武都王內徙京師元和從叔僧嗣復自稱武都王於葭蘆僧嗣死從弟文度自立為武興王孝文初征西將軍皮歡喜攻葭蘆破之文度弟鼠自立為武興王奉表謝罪孝文拜鼠都督南秦州刺史征西將軍

西戎校尉武都王鼠死從子後起統位孝文復以鼠爵授之後起死以鼠子集復為武興王集死子紹先立紹先年幼委事二叔集起集義後為建武將軍傅豎眼所破執紹先送京師遂滅其國魏末天下亂紹先奔還武興復自立為王紹先死子辟邪立周太祖討平之乃以大將軍宇文貴為都督興州刺史

宕昌羌後魏時有梁勒者世為首帥得羌豪心乃自稱王焉勒孫彌忽太武初遣子彌黃奉表求內附拜為宕

昌王彌忽死孫彪子立彪子死彌治立彌治死子彌機立

東女國本西羌之別種俗以女為王號為賓就唐武德中其王湯滂氏垂拱二年其王歛臂天授三年其王俄琰兒爾並遣使朝貢天寶元年封其王趙曳夫為歸昌王是後以男子為王貞元九年其王湯立悉內附授歸化州刺史

吐蕃本西羌之種國人號其王為贊普唐永徽元年贊

普賓王弄讚堯弄讚子早死其孫繼立復號贊普時
年幼國事皆委於其相祿東贊祿東贊死其子欽陵復
專其國儀鳳四年不夜贊普卒嫡子噶弩悉弄即大臣
麴薩苦之甥也先與薩苦往年同徵發兵馬聞喪歸國
繼位為贊普時年八歲其弟年六歲時在欽陵之軍國
人以欽陵彊盛又欽奉之為主欽陵迫於大義竟與薩
苦協心噶弩悉弄位始定神龍元年噶弩悉弄卒諸子
爭立久之國人立其子棄隸踏贊為贊普時年七歲天

寶十四載贊普乞黎蘇籠獵贊死大臣立其子婆悉籠
獵贊為贊普貞元十三年卒長子立一歲卒元和十二
年會昌二年皆以贊普卒來告

西域罽賓國漢武帝時其王烏頭勞死子代立遣使奉
獻唐顯慶三年遣使朝貢訪其國俗云王始祖馨孽今
曰曷擷支父子傳位已十二代其年改其城為脩鮮府
龍朔初授其王都督十一州諸軍事開元七年冊其王
為葛邏達支特勒二十七年其王烏散特勒灑以年老

上表請嫡子拂菻蜀婆嗣位許之天寶四載又冊其子
勃匐准為襲蜀賓及烏菴國王仍授右驍衛將軍

烏孫漢武帝時其昆莫有十餘子中子大祿彊善將將
衆萬餘騎別居大祿兄太子太子有子曰岑陬太子蚤
死謂昆莫曰必以岑陬為太子昆莫哀許之大祿怒乃
収其昆弟將衆畔謀攻岑陬昆莫與岑陬萬餘騎令別
居昆莫亦自有萬餘騎以自備國分為三大總羈屬昆
莫後尚江都公主昆莫年老欲使岑陬尚公主公主不

聽天子令從其風俗岑陬遂妻公主昆莫死岑陬代立
岑陬者官號也名軍須靡昆莫王號也名獵驕靡後書昆
彌云岑陬胡婦子泥靡尚小岑陬且死以國與季父大
祿子翁歸靡曰泥靡大以國歸之翁歸靡既立號肥王
復尚楚主解憂生三男兩女元康二年上書願以漢外
孫元貴靡為嗣得令復尚漢公主乃以解憂弟相夫為
公主遣之未出塞聞翁歸靡死貴人共從本約立岑陬
小子泥靡代為昆彌號狂王其後為翁歸靡胡婦子烏

就屠所殺烏就屠自立為昆彌詔立元貴靡為大昆彌
烏就屠為小昆彌元貴靡死子星靡代為大昆彌星靡
死子雌栗靡代小昆彌烏就屠死子拊離代立拊離為
弟日貳所殺漢遣使者立拊離子安日為小昆彌後為
降民所殺漢立其弟末振將代末振將恐為大昆彌雌
離靡所并使貴人烏日領詐降刺殺之漢立雌栗靡季
父公主孫伊秩靡為大昆彌漢没入小昆彌侍子在京
師者久之大昆彌翎侯難栖殺末振將以其兄安日子

安黎靡代為小昆彌是歲元延二年也

拘彌國後漢永建四年其王興為于闐王放前所殺自立其子為拘彌王陽嘉元年燉煌太守徐繇遣疏勒王擊破于闐更立興宗人成國為拘彌王熹平四年于闐王安國攻拘彌殺其王戊巳校尉西域長史各發兵輔立拘彌侍子定興為王

于闐國後漢永平中其王休莫霸死兄子廣得立永建六年其王放前遣侍子貢獻

大月氏國漢時貴霜翎侯丘就卻自立為王國號貴霜
丘就卻年八十餘死子閻膏珍代為王

莎車國漢宣帝時烏孫公主小子萬年莎車王愛之莎
車王無子死死時萬年在漢莎車國人計欲自託于漢
又欲得烏孫心乃上書請萬年為王萬年既立暴惡國
人不說莎車王弟呼屠徵殺萬年自立漢烈侯馮奉世
發兵擊殺之更立它昆弟子為莎車王至元帝時其王
延嘗為侍子長於京師王莽天鳳五年延死謚忠武王

子康代立後漢建武九年康死謚宣成王弟賢代立賢為于闐王廣德所虜匈奴遣兵將賢質子不居徵立為莎車王廣德又攻殺之更立其弟齊黎為王章帝元和三年降漢

疏勒國後漢永平十六年龜茲王建殺疏勒王成自以龜茲左侯兜題為疏勒王是年漢遣軍司馬班超劫縛兜題而立成之兄子忠為疏勒王元初中其王曰安國以舅臣磐有罪徙于月氏後安國死無子母持國政與

國人共立臣磐同產弟子遺腹為疏勒王臣磐聞之請
月氏王曰安國無子種人微弱若立母氏我乃遺腹叔
父也我當為王月氏遣兵送還疏勒國人素敬愛臣磐
又畏憚月氏即共奪遺腹印綬迎臣磐立為王至靈帝
建寧元年疏勒王為其季和得所射殺和得自立為王
龜茲國漢時其王絳賓以烏孫公主為夫人絳賓死六
子丞德自謂漢外孫成帝時往來尤數隋大業中其王
姓白氏曰蘇尼啞唐武德初其王蘇伐勃馱並遣使來

朝勃駃卒子蘇伐疊代立號時健莫賀俟利發疊死其弟訶黎布失畢代立貞觀末阿史那社爾伐龜茲繫其王送於京師立其弟葉護為王永徽七年又以訶黎布失畢為右驍衛大將軍尋放還蕃撫其餘衆依舊為龜茲王顯慶二年立其王嗣子白素稽為龜茲王授右驍衛大將軍仍遣使就加冊命開元七年其王白漢苾卒以其嫡子孝節襲位

車師都尉國漢時其王太子曰軍宿白奴欲以為質軍

宿焉耆外孫不欲質匈奴亡走焉耆車師王更立子烏
貴為太子後為車師王為子工所擊亡走烏孫烏孫留
不遣使上書願留其車師王備國有急可從西道以擊
匈奴漢許之於是漢召故車師太子軍宿在焉耆者立
以為王

高車國者漢車師前王之庭也後魏時蠕蠕立闕伯周
為高昌王太和初伯周死子義成立為從兄首歸所殺
首歸自立為高昌王五年為高車王阿伏至羅所殺以

燉煌人張孟明為王為國人所殺更以馬儒為王以鞏
顧麴嘉二人為左右長史儒又通使後魏請內屬人皆
戀土不願東遷相與殺儒立嘉為王延昌中以嘉為持
節平西大將軍瓜州刺史秦品縣開國伯嘉死子堅立
堅死子伯雅立唐武德二年伯雅死子文泰嗣貞觀十
四年稱疾不朝太宗命吏部尚書侯君集征之泰死子
智盛嗣立君集遂拔其城置安西都護府

焉耆國隋大業中其王姓龍名突騎支唐貞觀十四年

安西都護郭孝恪發兵擊之虜突騎支獻於維陽太宗
赦其罪留於京師其國乃立薛婆阿那支號為瞎于阿
史那社爾之討龜茲也阿那支率兵龜茲共禦大軍社
爾擒而斬之立龍婆伽利為王即突騎支弟也永徽三年
龍婆伽利死其國人請立前王突騎支為王高宗許之
加授右武衛將軍令還本蕃開元七年其王龍嬾突薨
以其焉吐拂延襲位

波斯國其王初嗣位便密選諸子才堪承統者名字封

而藏之王死後大臣與王之羣子共發封而視之奉所書名為王唐貞觀二十一年其王伊嗣俟龍朔元年其國王卑路斯並遣使朝貢高宗列其地疾陵城為波斯都督府授卑路斯為都督

大食國隋大業中其王名敝蜜莫末贖自云有國已四十四年歷三主矣一說隋開皇中大食族中有孤列種代為酋長孤列有二姓一號盆尼奚深一號盆尼末換後有摩訶末者勇健多智衆立之為王摩訶末後十四

代至末換殺其兄為部人所殺遂求得奚深種阿蒲羅
拔立之阿蒲羅拔卒立其弟阿蒲恭拂恭拂卒子迷地
立迷地卒子牟栖立牟栖卒弟論立是歲貞觀二年也
石國唐顯慶三年列其地為大宛府以其王噉吐屯攝
舍提於屈昭穆為都督開元初封其王莫賀咄吐屯為
石國王九年其王曰伊吐屯屈勒天寶五載封其王子
那偈車鼻施為懷化王

吐火羅國唐永徽三年列其地為月氏府以其葉護阿

史那烏濕波為都督開元七年其葉護曰支汗那十七年冊其首領骨咄祿頓達度為葉護天寶八載其葉護失里忙伽羅並遣使朝賀

康國本康居之苗裔唐武德七年其王曰屈术支顯慶三年其王曰拂呼髮是年高宗列其地為康居府以拂呼髮為都督萬歲通天元年則天封其大首領篤婆鉢提為王鉢提尋卒又冊立其子泥濕師師為王泥濕師師卒冊立其子突昏為王開元十九年其王烏勒卒上

表請封其子咄曷為曹國王許之二十七年烏勒卒遣使冊咄曷襲其父位

史國唐顯慶三年列其所治為佉沙州以其王昭武失阿曷為刺史開元十五年其王曰阿忽鉢多延屯二十七年卒冊立其子阿忽鉢為王二十九年其王斯謹提立

冊府元龜卷九百六十六

欽定四庫全書

冊府元龜卷九百六十七 宋 王欽若等 撰

外臣部

繼襲第二

西北吐谷渾本鮮卑徒河涉歸之子涉歸晉時封昌黎
公死子若落廐化統部落而庶長吐谷渾西附陰山吐
谷渾死長子吐延嗣吐延性酷刻暴為昂城羌酋姜聰
所刺劍猶在體呼子葉延語其大將絕拔渥曰吾氣絕

棺歛訖便速去保白蘭白蘭地既險遠又土俗懦弱易
控禦葉延小付汝汝竭股肱之力以輔之傳子得立吾
無恨矣抽劔而死葉延立乃以王父字為氏亦以為國
號葉延死子碎奚立性淳謹三弟專權碎奚不能制諸
大將共誅之碎奚憂哀不復攝事遂立子視連為世子
委之事號曰莫賀郎華言父也視連立十五年死弟視
羆立視羆死子樹維千並幼弟烏紇提立烏紇提死樹
維千立自號車騎將軍是歲晉義熙初也樹維千死弟

阿豺立自號驃騎將軍沙州刺史宋少帝封為澆河公
阿豺臨死召諸子弟告之曰先公車騎捨其子虔以大
業屬吾吾豈敢忘先公之舉而私於緯代其以慕瓚繼
事阿豺有子二十人又謂之曰汝等各奉吾一隻箭將
玩之地下俄而命母弟慕利延曰汝取一隻箭折之慕
延折之又曰汝取十九隻箭折之慕延不能折阿豺曰
汝曹知乎单者易折衆則難摧戮力一心然後社稷可
固言終而死宋文帝又授慕瓚為隴西公後魏大武遣

使冊拜慕瓚為大將軍西秦王大延二年慕瓚死弟慕利延立改封西平王慕利延死樹錐子拾寅立始邑於伏羅川後拜為西平王太和五年拾寅死子易侯立易侯死子伏連籌立封為吐谷渾王伏連籌死子夸呂立始自號為可汗居伏侯城夸呂在位百年餘卒子世伏嗣世伏為國人所殺立其弟伏允為主為隋所擊客于党項大業末天下亂伏允復其故地唐貞觀九年詔特進李靖討破之伏允自縊而死國人乃立其嫡子大寧

王順為可汗稱臣內附太宗封順為西平郡王仍授越
胡呂烏甘豆可汗順立未幾為臣下所殺其子燕王諾
曷鉢嗣立封為河源郡王仍授烏地也拔勒豆可汗其
後吐谷渾為吐蕃所得諾曷鉢徙其部衆于靈州之地
置安樂州以諾曷鉢為刺史垂拱四年卒子忠嗣忠卒
子宣趙嗣聖歷三年襲父烏地也拔勒豆可汗宣趙卒
子曦皓嗣曦皓卒子兆嗣及吐蕃陷安樂州其部衆又
東徙散在朔方河東之境貞元十四年以朔方軍節度

副使慕容復為襲長樂州都督青海國王烏地也拔勒
豆可汗未幾卒其封遂絕唐末有首領赫連鐸拓拔思
泰後唐有白承福念公山薛糞堆各有部族

北狄匈奴秦始皇時單于曰頭曼有太子名曰冒頓代
為單于漢文帝時冒頓死子稽粥立號曰老上單于後
四年老上單于死子軍臣單于立元朔中軍臣單于死
其地左谷蠡王伊犀斜自立為單于攻敗軍臣單于大
子於單于單于亡降漢漢封於單于陟安侯伊犀斜單于

立十三年死子烏維立為單于是歲元鼎三年也烏維
單于立十歲死子詹師廬立年少號為兒單于是歲元
封六年也兒單于立三歲而死子少白奴乃立其季父
烏維單于弟右賢王句黎湖為單于是歲太初三年也
其冬病死其弟左大將都督且鞮侯立為單于且鞮侯
單于立五年死長子左賢王立為狐鹿姑單于是歲太
始元年也初且鞮侯兩子長為右賢王次為左大將病
且死言立右賢王右賢王未至貴人以為有病更立左

大將為單于右賢王聞之不敢進左大將使人召右賢王而讓位焉右賢王辭以病左大將不聽謂曰即不幸死傳之與我右賢王許之遂立為狐鹿姑單于狐鹿姑單于立以左大將為右賢王數年病死其子先賢禪不得代更以為日逐王日逐王者賤于右賢王單于自以其子為右賢王狐鹿姑單于有異母弟為左大都督賢國人鄉之母闕氏恐單于不立子而立左大都尉也乃私使殺之左大都尉同母兄怨遂不肯復會單于庭又

單于病且死謂諸貴人我子少不能治國立弟左谷蠡王及單于死衛律等與顛渠閼氏謀匿單于死詐矯單于令與貴人歆盟更立子左谷蠡王為壹衍鞬單于是歲始元二年也壹衍鞬單于立十七年死弟左賢王立為虛問權渠單于是歲地節三年也虛問權渠單于立九年死顛渠閼氏與其弟右大且渠都隆奇謀立右賢王屠耆堂為握衍朐鞬單于握衍朐鞬立二歲暴虐殺伐國中不附其明年始夕劬王與烏禪幕及左地貴人

共立稽侯獮為呼韓邪單于發左地兵四五萬人西擊
握衍胸鞬單于兵敗自殺呼韓邪立二十八年建始二
年死呼韓邪嬖左伊秩訾兄呼衍王女二人長女顛生
二子曰且莫車次曰囊知牙斯少女為大閼氏生四子
長曰雕陶莫臯次曰且糜胥皆長於且莫車二人皆小
於囊知牙斯顛渠閼氏貴且莫車愛呼韓邪病且死欲
立且莫車其母顛渠閼氏曰匈奴亂十餘年不絕如髮
賴蒙漢力故得復安今平定未久人民創艾戰鬥且莫

車年少百姓未附恐復危國我與大閼氏一家共子不
如立雕陶莫臯大閼氏曰且莫車雖少大臣共持國事
今舍貴立賤後世必亂單于卒從顓渠閼氏計立雕陶
莫臯約令傳國與弟呼韓邪死雕陶莫臯立為復索株
若鞮單于復索株立十歲鴻嘉元年死弟且靡胥立為
搜諧若鞮單于以且莫車為左賢王搜諧立八年元延
二年死弟且莫車立為車牙若鞮單于車牙立四歲綏
和元年死弟囊知牙斯立為烏珠留若鞮單于烏珠留

立二十一歲王莽建國五年死匈奴用事大臣右骨都
侯湏卜當即王昭君女伊墨居次云之婿也云嘗欲與
中國和親又素與粟置支侯咸厚善見咸前後為莽所
拜故遂越輿而立咸為烏累若鞮單于烏累單于咸立
以弟輿為左谷蠡王烏累若鞮單于立五歲天鳳五年
死弟左賢王輿立為呼都而尸道臯若鞮單于後漢建
武二十二年單于輿死子左賢王烏達鞮侯立為單于
後死弟左賢王蒲奴立為單于

南匈奴醯落尸逐鞮單于比者呼韓邪單于之孫烏珠留若鞮單于之子自呼韓邪後諸子以次立至比季父單于興時比為右莫鞮日逐王部領南邊及烏桓後漢建武二十二年單于興死比密遣人郭衡奉匈奴地二十三年詣西河太守求內附二十四年春八部大人共議立比為呼韓邪單于以其大父嘗依漢得安故欲襲其號單于比立九年薨弟左賢王莫立是為丘浮尤鞮單于莫中元元年立一年薨弟汗立是為伊伐於慮鞮

單于汗中元二年立二年薨單于比之子適立是為醯
僮尸逐侯鞬單于適永平二年立四年薨單于莫子蘇
立是為丘除車林鞬單于數日薨單于適之弟長立為
湖邪尸逐侯鞬單于長永平六年立二十二年薨單于
汗之子宣立是為伊屠於閭鞬單于宣元和二年薨單
于長之弟屯屠何立是為休蘭尸逐侯鞬單于屯屠何
章和二年立六年薨單于宣弟安國立安國初為左賢
王無稱譽是以中國盡敬左谷蠡王師子而不附安國

立二年為舅骨都侯喜為等所殺立單于適之子師子
是為亭獨尸逐侯鞬單于師子永元六年立四年薨單
于長之子檀立是為萬民尸逐鞬單于檀永元十年立
二十七年薨弟牧立是為烏稽侯尸逐鞬單于拔延光
三年立四年薨弟休利立是為去特若尸逐就單于休
利永建三年立十三年為中郎將陳龜逼迫之自殺時
呼蘭若尸逐就單于兜樓儲先在京師漢安二年立之
遣行中郎將持節護送單于歸南庭兜樓儲立五年薨

伊陵尸逐就單于居車兒建和元年立二十五年薨子
某立是為屠特若尸逐就單于某熹平元年立六年薨
子呼徵立呼徵光和元年立二年中郎將張脩與單于
不相能脩擅斬之更立右賢王羌渠為單于羌渠光和
元年立十年為國人所殺子右賢王於扶羅立是為持
至尸逐侯單于於扶羅中平五年立七年死弟呼厨泉
立建安二十一年來朝魏太祖因留於鄴遣右賢王去
卑歸監其國

烏桓後漢靈帝初遼西有丘力居者衆五千餘落自稱
王獻帝初平中丘力居死子樓班年小從子蹋頓有武
畧代立總攝三王部衆皆從其號令其後上谷王難樓
遼東峭王蘇僕延率其部衆奉樓班為單于鮮卑後漢
建武末封大人於仇賁為玉蒲頭為侯永初中賜大人
燕荔陽王印綬不詳其子孫繼襲至桓帝時有檀石槐
者勇健有智畧部落推為大人東西部大人皆歸焉光
和中檀石槐死子和連代立靈帝末年數為寇鈔攻北

地北地庶人善弩射中和連和連即死其子騫曼年小
兄子魁頭既立後騫曼長大與魁頭爭國衆遂離散魁
頭死弟步度根代立後為大人軻比能所殺魏文帝封
軻比能為附義王比能死立其弟素利彌加為歸義王
大和二年素利死子小以弟成律歸為王代攝其衆北
突厥者匈奴之別種後魏時號土門部落魏末有伊利
可汗伊利卒弟阿逸可汗立阿逸病且卒捨其子攝圖
立其弟俟斤是為木杆可汗在位二十年卒復捨其子

事邏便而立其弟是為他鉢可汗他鉢以攝圖為爾伏
可汗統其東面又以其弟禡但可汗子為步難可汗居
西方他鉢在位十年病且卒謂其子菴羅曰吾聞親莫
過父子吾兄不親其子委位與我我死汝當避大邏便
也及他鉢卒國中將立大邏便以其母賤衆不服菴邏
母貴突厥素重之攝圖最後至謂國中曰若立菴邏者
我當率兄弟以事之如立大邏便我必守境利刃長矛
以相待矣攝圖長而且雄國人皆憚莫敢拒者竟立菴

邏為嗣大邏便不得立心不服蒼邏每遣人詈辱之蒼
邏不能制因以國讓攝圖國中相與議曰四可汗之子
攝圖最賢因迎立之號伊利俱盧設始波莫荷可汗一
號沙鉢畧治都斤山蒼邏降居獨維水稱第二可汗隋
開皇中卒攝圖以其子雍虞閭性慙遣令立其弟葉護
處羅侯雍虞閭遣使迎處羅侯將立之處羅侯曰我突
厥自木杆可汗以來多以弟代兄以庶奪嫡失先祖之
法不相敬畏汝當嗣位我不憚拜汝也雍虞閭又遣使

謂處羅侯曰叔與我父共根連體我是枝葉寧有我作
王令根本反同枝葉令叔父之尊下我卑稚又亡父之
命其可廢乎願叔勿疑相讓者五六處羅侯竟立是為
葉護可汗以雍虞閭為葉護遣使上表言狀隋高祖賜
之鼓吹幡旗後處羅侯西征阿波中流矢而卒其衆奉
雍虞閭為主是為頡伽施多那都藍可汗都藍開皇末
為麾下所殺是時沙鉢畧子染干號突利可汗尚義成
公主拜染干為意利弥豆啟民可汗華言意智健也於

朔方築大利城以居之大業十年啟民朝於東都是歲疾終煬帝為之廢朝三日立其子咄吉世是為始畢可汗唐武德二年卒其子什鉢苾以年幼不堪嗣位立為泥步設使居東偏直幽州之北立其弟俟利勿設是為處羅可汗尚義成公主三年處羅死義成公主以其子奧射設醜弱廢不立之遂立處羅之弟咄苾是為頡利可汗頡利以始畢之子什鉢苾為突利可汗頡利貞觀四年寇邊為行軍副總管張寶相所擒送於京師突利

來奔乃封為北平王拜順州都督遣帥部眾還蕃五年
徵入朝至并州道病卒子賀邏鶻嗣

西突厥者木杆可汗之子大邏便也與沙鉢畧有隙因
分為二大邏便為處羅侯所執其國立鞅素特勒之子
是為泥利可汗泥利卒子達漫立號泥掘處羅可汗隋
大業中從煬帝征高麗賜號為曷薩那可汗唐武德中
來奔為北突厥使人所殺初薩那之朝隋也國人立薩
那之叔父曰射匱可汗射匱卒弟統葉護可汗代立統

葉護為其伯父所殺而自立是為莫賀咄侯突屈利侯
毘可汗俟毘先分統突厥種類為小可汗及此自稱大
可汗國人不附弩失畢部共推泥孰莫賀設為可汗泥
孰不從時統葉護之子啞力特勒亡在康居遂迎立之
是為乙毘沙鉢邏肆葉護可汗泥孰遂適焉耆肆葉護
卒國人迎泥孰於焉耆而立之是為咄陸可汗泥孰卒
其弟同娥設立是為沙鉢羅啞利失可汗啞利失為其
統吐屯所襲國人欲立谷設為乙毘咄陸可汗啞利失

奔鏖汗而死弩失畢部落酋帥迎其弟伽那之子薄布特勒立之是為乙毘沙鉢邏葉護可汗唐貞觀十五年吐陸可汗為部下所廢遣使詣闕請立可汗太宗遣使齎璽書立莫賀乙毘可汗之子是為乙毘射匱可汗尋為葉護阿史那賀魯所併顯慶二年既平賀魯三年詔置崑陵濛池二都督府乃冊阿史那彌射為興昔可汗兼崑陵都護阿史那步真為繼往絕可汗兼濛池都護乾封二年二可汗既死餘衆附于吐蕃調露元年以碎

葉龜茲于闐疏勒為四鎮垂拱元年以步真子左玉鈐
衛將軍阿史元慶襲其父興昔亡可汗二年以彌射子
右玉鈐衛將軍阿史那斛瑟羅襲父繼往絕可汗聖歷中
突騎施首領盟祿州都督烏質勒移衙於碎葉則天授
以瑤池都督神龍中烏質勒死子婆葛代立仍封金河
郡王俄為默啜所殺其部將蘇祿鳩聚眾至二十萬自
立為可汗開元十三年詔冊蘇祿為忠順可汗二十六
年為莫賀咄達于所殺其別部都摩友立蘇祿之子吐

火仙為可汗二十九年以斛瑟羅之孫懷道之子所為
可汗遣之天寶元年所至碎葉西南俱蘭城為莫賀咄
所殺詔立其酋長為伊地米里骨咄祿毘伽可汗十三
年又別冊黑姓種伊羅密施為骨咄祿毘伽突騎施可
汗自至德年後部落衰弱分為二部各立可汗旋又篡
奪因而分散鐵勒木角奴別種隋初屬西突厥大業中
部人共推契苾哥楞為易胡貞莫賀可汗又以薛延陀
乙失鉢為也咥小可汗其後西突厥射匱可汗強盛延陀

之孫夷男帥其屬攻頡利可汗大破之頡利北諸姓多
叛頡利歸于夷男共推為主太宗拜夷男為貞珠毘伽
可汗夷男卒少子肆葉護襲位是為頡利俱利薛婆多
彌可汗其下不附太宗使江夏王道宗討平之列為州
縣其後薛延陀西道之衆共推夷男子吐摩支為伊特
勿失可汗二十二年契苾迴紇等十餘部落歸國太宗
因其土地置為州府拜其酋長為都督刺史

回紇本匈奴之裔唐初有時健侯斤死子菩薩部落以
為賢而立之貞觀二十年太宗以其部為瀚海府拜其
侯利發吐迷度為都督時吐迷度已自稱可汗二十二
年吐迷度為其姪烏紇所殺其子婆閏立顯慶中累加
左衛大將軍兼瀚海都督龍朔中婆閏死姪比粟毒主
領迴紇永隆中獨解支證聖中伏帝匐開元中承宗伏
帝難皆繼為酋長皆受都督號以統蕃州天寶初其酋
長葉護頡利吐發遣使入朝封奉義王三載擊破拔悉

密自稱骨咄祿毘伽闕可汗五載又遣使入朝因冊為
懷仁可汗六載卒子磨延啜立國人號為葛勒可汗乾
元三年葛勒卒長子葉護先被殺乃立其少子移地健
是為登里可汗寶應二年冊為登里頡咄登密施舍俱
錄英義建功毘伽可汗大歷十四年為其相頓莫賀所
殺頓莫賀自立號為合骨咄祿毘伽可汗貞元四年冊
為天親可汗五年改紇為鶻從其請也是年天親可汗
卒子多邏斯立國人謂之判官持勒詔冊為登里邏波

密施俱錄忠貞毘伽可汗六年四月忠貞可汗為其次
相所殺立其子阿啜為可汗七年詔冊為奉誠可汗十
年奉誠可汗卒無子國人立其相骨咄祿將軍詔冊為
滕里邏羽祿沒密施合胡祿骨咄毘伽懷信可汗骨咄
祿將軍本姓跌跌少孤為迴鶻大首領所養奉誠既無
嗣國人因奉為主永貞元年懷信可汗卒詔冊其王為
愛登里邏泊德沒施俱錄毘伽可汗六年卒七年詔冊
其王為君登里邏骨德密施合毘伽可汗十一年卒詔

冊其王為愛登里邏汨沒密施合毘伽保義可汗長慶
元年卒詔冊其王為君登里邏羽錄密施合勾主祿毘
伽可汗三年卒其從父弟曷薩可汗立詔冊為君登里
邏汨沒密施合毘伽可汗太和六年為其下所殺其從
子胡特勒立詔冊為可汗開成四年自殺國人立勿篤
公為罽颯可汗會昌初其國為黠戛斯所侵餘衆奔歸
吐蕃處甘州之地後唐同光二年其國權知可汗仁美
遣使貢方物莊宗冊仁美為英義可汗其年仁美卒其

弟狄銀立同光四年狄銀卒阿咄欲立並遣使朝貢天
成三年其國權知可汗仁裕遣使入貢明宗冊仁裕為
順化可汗晉天福四年冊為奉化可汗

契丹其君長姓大賀氏唐貞觀二十二年蕃長窟哥內
屬授松漠都督封無極縣男賜姓李氏其曾孫楷莫離
則天時封歸順郡王萬歲通天中窟哥之裔李盡忠為
松漠都督盡忠死開元三年封其從父弟失活為松漠
郡王六年失活死從父弟娑固代統其衆遣使冊立仍

令襲其兄官爵安固為其下所殺立其從父弟儆于為主玄宗乃令冊立儆于令襲安固官爵十一年儆于死弟吐于代統其衆襲兄官爵吐于與大臣可突于相猜來奔可突于立盡忠弟卻固為王改封廣德郡王十八年可突于殺卻固降于突厥二十三年契丹衙官李過折殺可突于傳首東都詔封過折為北平郡王其年過折為可突于餘黨泥禮所殺會昌二年新立王名屈戌咸通末其王曰習爾之光啟中其王曰欽德有別部首

長阿保機自稱國王後唐天祐末僭稱皇帝天成元年
阿保機卒偽謚曰大聖皇帝保機凡三子長曰人皇王
突欲即東丹王也次曰元帥太子即德光也幼曰安端
少君其母述律氏令德光權王牙帳令安端少君往渤
海國代突欲將立為嗣而德光素為部族所伏又其母
亦嘗鍾愛故因而立之漢高祖即位初德光卒東丹王
突欲子兀欲立為天授皇帝周太祖廣順元年九月偉
王子太寧王與燕王耶律述輒殺兀欲并其妻於帳下

時德光子述律王子討太寧之亂諸部首領共推為國主偽號天順皇帝

奚本白奴之別種唐貞觀末酋長可度者內屬太宗置饒樂府以可度者為都督封樓煩縣公賜姓李氏開元三年封其首領李大酺為饒樂郡王八年大酺率兵救契丹戰死其弟魯蘇嗣立十年詔令襲其兄官爵十四年改封奉誠王十八年為契丹衙官可突于所脅走投榆關二十年酋長李詩以其部落五千帳來降封詩為

歸義王克歸義州都督天寶五載又封其王娑固為昭
信王仍授饒樂府都督元和元年其王梅落來朝二年
以奚首領索低為檀薊兩州游奕兵馬使天祐初首領
曰去諸去諸卒子掃刺代立後唐莊宗破幽州賜掃刺
姓名李紹威天成四年卒子素姑代立清泰三年其首
領達刺干遣通事介老奏其王素姑謀叛欲附契丹已
處置訖見權知部落

黑水靺漢武帝三年其部首長突地稽遣使朝貢以其

部置燕州拜突地稽為總管貞觀初有功賜姓李氏封
耆國公突地稽卒子謹行嗣封燕國公

渤海靺鞨唐聖歷中高麗別種大祚榮自立為振國王
先天二年冊拜渤海郡王仍以其所統為忽汗州加授
忽汗州都督開元七年祚榮卒玄宗遣使冊立其嫡子
桂婁郡王大武藝襲父為左驍衛大將軍渤海王忽汗
州都督九姓燕然都督二十五年武藝病死其子欽茂
嗣立詔襲其父官爵寶應元年進封國王欽茂卒其子

嵩璘嗣貞元十一年二月令內常侍殷志瞻將冊書冊
為渤海王忽汗州都督元和四年嵩璘卒子元瑜嗣元
瑜卒弟言義權知國務八年正月封言義為國王十三
年遣使告哀詔以知國務大仁秀為國王太和五年仁
秀卒以權知國務大彛震為國王梁開平元年其王曰
大諲謨

冊府元龜卷九百六十七

欽定四庫全書

冊府元龜卷九百六十八 宋 王欽若等 撰

外臣部

朝貢第一

周制九州之外謂之蕃國世壹見各以其所貴寶為贄
蓋古之聖王文德光被乃有占風望氣浮琛沒羽而至
者繇漢以來濟以威信命單車以通絕域置都護以總
北道繇是魚龍雀馬之殊玩犀甲珠翠之名寶寶隊火

義之異品夷歌巴舞之奇技莫不充於內府而陳於外
庭矣魏晉之後或朝或絕策書所記昭然可見若乃殊
隣絕壤蹈德詠仁祇奉國琛賓于宰旅先王所以賜異
姓之國分伯叔之邦時庸展親謹其述職唯服食器用
之是供也至於給耳目之華侈違生物之性習必斥之
而不御却之而不受慮嗜好之無極懼德志之或喪美
哉旅獒之篇召公之訓詳矣要荒之外羈縻不絕織皮
崑崙大禹以之即叙越裳重譯姬文形於德讓亦以其

忽畧無常非上威服而來其貢物故肅慎之不貢楛矢亦嘗致詰焉

夏后即位七年于夷來賓

少康即位三年方夷來賓

周武王克商西旅獻獒太保作旅獒以誡王自是通道九夷百蠻使各以其方賄來貢使無忘職業於是肅慎貢楛矢石弩長尺有咫

后芒即位三年九夷來御

周公居攝六年制禮作樂天下和平交趾之南有越裳國以三象重譯而獻白雉曰道路悠遠山川阻深音使不通故重譯而朝成王以歸周公公曰德不加焉則君子不饗其質化不施焉則君子不臣其人吾何以獲此賜也其使請曰吾受命吾國之黃耆曰久矣天之無烈風雷雨意者中國有聖人乎則蓋往朝之周公乃歸之於王稱先王之神致以薦於宗廟周德既衰於是稍絕成王既伐東夷肅慎來朝

宣王時追貊之國來貢故韓奕之詩曰獻其貔皮赤豹黃羆

漢文帝元年使陸賈賜南粵王佗書賈至南粵佗恐乃頓首謝願奉明詔長為藩臣奉職貢謹北面因使者獻白璧一雙翠鳥千犀角十紫貝五百桂蠹一器生翠四十雙孔雀二雙昧死再拜以聞皇帝陛下

武帝始遣使至安息國其國因發使隨漢使者來觀漢地以大鳥卵及犂軒眩人獻於漢天子大說又帝令張

騫使烏孫騫既致賜諭指曰烏孫能東居故地則漢遣公主為夫人結為昆弟共拒匈奴不足破也烏孫遠漢未知其大小又近匈奴服屬日久其大臣皆不欲徙昆莫年老國分不能專制乃發使送騫因獻馬數十匹報謝其使見漢人眾富後歸其國其國後乃益重漢元狩二年南越獻馴象能言鳥

天漢元年正月匈奴歸漢使者使使來獻

二年秋渠黎六國使使貢獻

宣帝神爵二年匈奴握衍胸鞬單于立復脩和親遣弟
伊酋若王勝之入漢獻見

四年五月匈奴單于遣弟呼留若王勝之來朝

甘露元年冬匈奴單于遣弟左賢王朝賀

三年匈奴郅支單于亦遣使奉獻漢遇之甚厚

四年匈奴呼韓邪郅支兩單于俱遣使朝獻漢待呼韓
邪使有加

成帝河平元年單于遣右臯林王伊邪莫演等奉獻朝

正月

平帝元始元年春正月越裳氏重譯獻白雉一黑雉二
詔使三公以薦宗廟

二年日南之黃支國來獻犀牛

後漢光武初公孫述據益州夜郎大姓龍傅尹董氏保
境為漢乃遣從番禺江奉貢帝嘉之並加褒賞

建武六年匈奴遣使來獻使中郎將報命

八年十二月高句麗王遣使奉貢

十三年九月日南徼外蠻夷獻白雉兔

十四年莎車國王賢與鄯善王安並遣使詣闕貢獻於
是西域始通葱嶺以東諸國皆屬賢

是年匈奴遣使奉獻使中郎將報命

十七年十二月莎車國遣使貢獻

二十年韓人廉斯人蘇馬鞬等詣樂浪貢獻

二十五年南匈奴單于復遣使詣闕奉藩稱臣獻國珍
寶求使者監護遣侍子修舊約

是歲夫餘王遣使貢獻遼西烏桓大人郝且等九百二十二人率衆向化詣闕朝貢獻奴婢牛馬及弓虎豹貂皮

三十年鮮卑大人於仇賁率衆人詣闕朝貢

三十一年北匈奴遣使奉獻

中元二年東夷倭奴國王遣使奉獻使人自稱大夫倭國之極南界也

明帝永平十七年西南夷哀牢儋耳僬僥槃木白狼動

黏諸種前後慕義貢獻

章帝元和元年正月日南徼外蠻夷究不事人邑蒙獻
生犀白雉

章和元年月氏國遣使獻扶拔獅子

和帝以章和二年二月即位十月安息國遣使獻獅子
扶拔

永平元年北單于弟右溫禺鞞王奉奏貢獻

六年正月永昌徼外夷敦忍乙王莫延慕義遣使譯獻

犀牛大象

九年正月永昌徼外蠻及撣國王壅繇調遣重譯奏國

珍寶

十年十二月燒當羌豪迷唐等率種人詣闕貢獻

十三年十一月安息國王滿屈遣使獻獅子及條枝大
爵時謂之安息爵

十六年十一月北匈奴遣使稱臣貢獻

殤帝以元興元年十二月即位是月北匈奴遣使稱臣

詣燉煌奉獻

安帝永初元年三月永昌徼外僣僥夷貢獻內屬
十月倭國王師升等遣使奉獻口百六十願請見
三年正月高句麗遣使貢獻

元初二年正月蜀郡青衣道夷奉獻內屬

永寧元年十二月永昌徼外遣使朝獻

是月揮國王壅繇調復遣使者詣闕朝賀獻樂及幻人
是歲夫餘王遣子詣闕奉獻

延光元年二月夫餘王遣使貢獻

十二月九真徼外蠻夷貢獻內屬

三年七月日南徼外蠻豪帥詣闕貢獻

順帝永建二年三月疏勒國臣磐遣使奉獻

六月西域長史班勇燉煌太守張朗討焉耆尉黎危須

三國破之並遣子貢獻

四年拘彌國遣使貢獻

五年正月疏勒王侍子及大宛莎車王皆遣使貢獻

六年二月于闐王遣侍子貢獻

十二月日南徼外葉護國捍國遣使貢獻

是月于闐王遣侍子詣闕貢獻

陽嘉二年六月疏勒國獻獅子封牛

漢安二年二月鄯善國遣使貢獻

桓帝延熹二年天竺國來獻其國和帝時數遣使貢獻
後西域反叛乃絕至是從日南至徼外來獻

四年十月天竺國十二月夫餘王並遣使來獻

九年九月大秦國王遣使奉獻漢世唯一通馬

靈帝建寧九年燒當羌遣使貢獻

熹平二年十二月日南徼外國重譯貢獻

三年正月夫餘國遣使貢獻

光和六年正月日南徼外國重譯貢獻

獻帝建安七年于闐國獻馴象

延康元年濊貊扶餘單于焉耆于闐王各遣使貢獻

魏文帝黃初元年鮮卑步度根遣使獻馬

三年二月鄯善龜茲于闐王各遣使奉獻

五年鮮卑步度根詣闕貢獻厚加賞賜是後一心守邊
不為寇害

明帝太和三年十二月大月氏王波調遣使奉貢

五年四月鮮卑附義王軻比能率其種人及丁零大人
兒禪詣幽州貢名馬

青龍四年五月肅慎氏貢楛矢

景初元年七月遣幽州刺史毋丘儉率衆軍討遼東右

北平烏丸單于寇婁敦遣弟阿羅獎等詣闕朝貢

二年六月倭女王遣大夫難升米等詣郡求謁天子朝
獻太守劉夏遣使送詣京都

三年二月西域重譯獻火浣布詔大將軍太尉臨試以
示百寮

齊王正始元年春東倭重譯納貢焉耆危須諸國弱水
南鮮畧名王皆遣使來獻

四年十二月倭國女王倭彌呼遣使大夫伊聲耆掖邪

狗等八人上獻生口倭錦絳青縑繇衣帛布丹木狝短
弓矢

八年倭國女王壹與遣大夫掖邪狗等詣臺獻上男女
生口三十人貢白珠五千枚青大句珠二枚異文雜錦
二十匹

陳留王景元二年七月樂浪外夷韓濊貊各率其屬來
朝貢

三年四月遼東郡言肅慎國遣使重譯入貢獻其國弓

三十張長三尺五寸楛矢長一尺八寸石砮三百枚皮骨鐵雜鎧二十領貂皮四百枚

吳孫權赤烏六年十二月扶南王范旆遣使獻樂人及方物

晉武帝泰始元年倭人國女王遣使重譯朝獻扶南國亦遣使朝貢

二年十一月倭人來獻方物

三年裨離國遣小部獻其方物康居國王那鼻遣使上

封事并獻善馬

四年扶南國遣使來獻林邑國王胡達上疏貢金盤椀
及金鉦等物

六年九月大宛獻汗血馬焉耆來貢方物

咸寧元年六月鮮卑力微遣子來獻

五年十二月肅慎來獻楛矢石砮

太康元年辰韓王遣使獻方物是年東夷二十國朝獻
二年三月東方辰韓等五國朝獻

三年九月東夷二十九國歸化獻其方物

五年十二月林邑大秦國各遣使來獻

六年四月扶南等十國來獻

七年扶南等二十一國馬韓等十一國使人來獻

八年南夷扶南西域康居國各遣使來獻

十年東夷絕遠三十餘國西南夷二十餘國各遣使來

獻

太熙元年東夷七國朝貢十年辰韓詣東夷校尉何龕

上獻

元帝大興二年八月肅慎獻楛矢石砮

成帝時肅慎國遣使來獻

肅慎有石砮皮骨之甲檀弓三尺五寸楛矢長尺有咫其

國東北有山出石其利入鐵將取之必先祈神周武王時獻其楛矢石砮逮于周公輔成王復遣使入賀爾時千餘年雖秦漢之盛莫之致也及文帝作相魏景元末來貢楛矢石砮等文帝召歸于相府賜其王僂奚錦罽綿至武帝元康初復來貢獻元帝中興又詣江左貢其石砮

咸康二年高句驪遣使貢方物

六年十月林邑獻馴象

康帝建元元年高句驪遣使朝獻

後秦姚萇時二城故曹寅王達獻馬三千疋

前涼張重華時龜茲國遣使貢方物

南燕慕容盛長樂中高句麗王安遣使貢方物

北燕馮跋時蠕蠕大檀遣使獻馬三千疋羊萬口

宋高祖永初二年林邑王范陽邁遣使貢獻

少帝景平元年三月高麗國遣使朝貢

二年高麗國遣使貢獻

文帝元嘉五年天竺迦毘黎國王月愛遣使奉表獻金剛指環摩勒金環諸寶物赤白鸚鵡各一

六年七月百濟王西河王河南國遣使獻方物

七年倭國王訶羅陁國林邑國獅子國遣使獻方物

是歲訶羅單國遣使獻金剛指環赤鸚鵡烏天竺國白

毘古貝葉婆國古貝等物其表語畧同佛經

九年河南王西河王並遣使獻方物

十年林邑王闍婆洲訶羅單國並遣使獻方物

十一年林邑國扶南國訶羅單國並遣使獻方物

十二年獅子國扶南國訶羅單國並遣使獻方物是年

闍婆娑達國國王師黎娑婆達訶陀羅跋摩遣使奉表曰

宋國大主大吉天子足下教化一切種智安穩天人師

降伏四魔咸等正覺轉尊法輪度脫衆生我雖在遠亦

霑靈潤

十三年高麗國武都王遣使獻方物

十四年河南王西河王訶羅單國並遣使獻方物

十五年武都王河南國高麗國倭國扶南國林邑國並遣使獻方物

十六年武都王河南王林邑國高麗國並遣使獻方物
十七年武都王河南王百濟國遣使獻方物

十八年肅特國高麗蘇摩黎國林邑國並遣使獻方物
是歲斤陁利國王釋婆羅那遣長史竺留陀及多獻金銀寶器

十九年婆皇國芮芮國並遣使獻方物

二十年河西國高麗國百濟國倭國並遣使獻方物

二十六年婆皇國婆達國並遣使獻方物

二十七年百濟國遣使獻方物

二十八 年婆皇國河南王高麗國婆達國並遣使獻方
物

二十九年訶羅單國遣使獻方物

孝武帝孝建二年槃槃國斤陀利國高麗國婆皇國河
南國遣使獻方物

大明二年河南王高麗國林邑國並遣使獻方物

三年婆皇國高麗國並遣使獻方物肅慎國重譯獻楛矢石砮西域獻舞馬

四年宕昌王倭國並遣使獻方物

五年河南王遣使獻方物

六年高麗國遣使獻方物

七年芮芮國百濟國並遣使獻方物

八年婆皇國遣使貢獻

明帝泰始二年天竺迦毘黎國遣使貢獻

泰豫元年林邑國遣使獻方物

後廢帝元徽元年河南王婆黎王並遣使獻方物

二年芮芮國遣使獻方物

三年河南王高麗國並遣使獻方物

順帝昇明元年倭國遣使獻方物

二年倭國高麗國芮芮國並遣使獻方物

南齊太祖建元元年五月河南王吐谷渾拾寅迦羅國

王荷知並遣使貢獻

二年三月百濟王牟都遣使貢獻九月蠕蠕遣使朝貢
三年十二月高麗王樂浪公高璉遣使貢獻

武帝永明二年八月扶南王僑陳如闍邪跋摩奉啓曰
天竺道人釋那伽仙從中國來此仰序陛下聖德仁治
詳議風化佛法興顯衆化殷集法事日盛王威嚴整朝
望國範慈愍蒼生八方六合莫不歸伏如聽其所說則
化隣諸天非可為喻臣聞之下情踊悅若暫奉見尊足

仰慕慈恩澤流小國天垂所載率土之民並得皆蒙恩
祐是以臣今遣此道人釋那伽仙為使上表問訊奉貢
微獻呈臣等赤心并別陳下情但所獻輕陋愧懼唯深
伏願天慈曲炤鑒其丹款賜不垂責今獻金鏤龍王坐
像一軀白檀像一軀牙像一軀牙塔二軀古貝二雙瑠
璃蘇釭二口瑇瑁檳榔杓一枚并獻頌章

九年五月林邑國遣使獻金篋

明帝建武三年高麗王樂浪公遣使貢獻

梁高祖天監元年八月林邑國遣使獻方物是年于陀
利國天王瞿曇修跋陀羅以四月八日夢見一僧謂之
曰中國今有聖主十年之後佛法大興汝若遣使貢奉
敬禮則土地豐樂商旅百倍若不信我則境土不得自
安修跋陀羅王未能信既而夢此僧曰汝若不信我當
與汝往觀之乃於夢中來至中國拜覲天子既覺心異
之陀羅本工畫乃寫夢中所見高祖容質飾以丹青仍
遣使并畫工奉表獻玉盤等物

二年七月龜茲國遣使獻方物扶南王遣使送珊瑚佛像并獻方物天竺國王屈多遣長史竺羅達奉表曰伏聞彼國據江傍海山川周固衆妙悉備莊嚴國土猶如化城宮殿莊飭街巷平坦人民充滿歡娛安樂大王出遊四兵隨從聖明仁愛不害衆生國中臣民循行正法大王仁聖化之以道慈悲羣生無所遣却常修淨戒式導不及無上法船沉溺以濟百姓氓庶受樂無忘諸天護持萬神侍從天魔降服莫不歸仰主身端嚴如日初

出仁澤普潤猶如大雲於彼震旦最為殊勝臣之所住
國土首羅天守護令國安樂王王相承未曾斷絕國中
皆七寶形像衆妙莊嚴臣自循簡如化王法臣名屈多
奕世王種惟願大王聖體和平今以此國羣臣民庶山
川珍重一切歸屬五體投地歸誠大王使人竺羅達繇
來忠信是故今遣大王若有所須珍奇異物悉當奉送
此之境土便是大王之國王之法令善道悉當承用願
二國信使往來不絕此信返還願賜一使具宣聖命備

悉勅宣歙至之誠望不空返所白如允賜加採納今奉獻琉璃唾壺雜香古貝等物

三年九月北天竺國遣使奉獻方物

四年四月宕昌國王梁彌博獻甘草當歸

五年七月鄧至國王象舒彭遣使獻黃耆四百斤馬四匹

九年四月林邑國遣使獻白猴一

是年于闐國遣使獻方物

十年十二月宕昌國遣使獻方物

是歲扶南王遣使貢獻

十一年三月高句麗四月百濟扶南林邑國六月宕昌國並遣使獻方物

十三年四月林邑國八月扶南國並遣使獻方物于闐國獻波羅婆步障

是年河南國王遣使獻金裝瑪瑙鐘二口又表于益州立九層佛寺詔許之

十四年四月丙丙國遣使獻方物

九月狼牙修國王婆伽達多遣使阿撒多奉表曰大吉
天子足下離淫怒癡哀愍衆生慈心無量端嚴相好身
光明朗如水中月普焰十方眉間白豪其白如雪其色
焰曜亦如月光諸天善神之所供養以垂正法寶梵行
衆生莊嚴都邑城閣高峻如乾陀山樓觀羅列道途平
正人民熾盛快樂安穩著種種衣猶如天服於一切國
為極尊勝天主愍念羣生人民安樂慈心深廣律儀清

淨正法化治供養三寶名稱宣揚布滿世界百姓樂見
如月初生譬如梵王世界之主人天一切莫不歸依敬
禮大吉天子足下猶如現前忝承先業慶嘉無量今遣
使問訊大意欲自往復畏大海風波不達今奉薄獻願
大家曲垂納領

十五年四月高麗國八月芮芮國並遣使獻方物河南
國遣使獻赤舞龍駒

其年滑國王厭帶夷粟陀始始遣使獻方物

十六年三月河南王八月扶南王遣使獻方物

是月婆利國遣使奉表曰伏承聖王信重三寶興立塔
寺校飭莊嚴周遍國土四衢平坦清淨無穢臺殿羅列
狀若天宮壯麗微妙世無與等聖主出時四兵具足羽
儀導從布滿左右都人士女麗服光飾市廛豐富充積
寶珍王法清整無相侵奪學徒皆至三乘競集敷說正
法雲布雨潤四海流通交會萬國長江渺漫清冷深廣
有生咸資莫能消穢陰陽和暢災厲不作大梁揚都聖

王無等臨覆上國有大慈悲子育萬民平等忍辱怨親
無二加以周窮無所蔽積靡不炷燭如日之明無不受
樂猶如淨月宰輔賢良羣臣貞信盡忠奉上心無異想
伏惟皇帝是我真佛臣是婆利國主今敬稽首禮聖王
足下惟願大王知我此心此心久矣非適今也山海阻
遠無緣自達故遣使奉金席等表此丹誠

十七年五月于阗利國鉢那跋摩遣長史毘員跋摩奉
表曰常勝天子陛下諸佛世尊常樂安樂六通三達為

世間尊是名如來應供正覺遺形舍利造諸塔像莊嚴
國土如須彌山邑居聚落次第羅滿城郭館宇如忉利
天宮具足四兵能伏怒敵國土安樂無諸患難人民和
善受化正法慶無不通猶雷處山流注雪水八味清淨
百川洋溢周迴屈曲順趨大海一切衆生咸得受用於
諸國土殊勝第一是名震旦大梁揚都天子仁蔭四海
德合天心雖人是天降生護世功德寶藏救世大悲為
我尊主威儀具足是故至誠敬禮天子足下稽首問訊

奉獻金芙蓉雜香藥等願垂納受

十八年七月于闐國獻瑠璃罌

普通元年正月扶南高麗國各遣使朝貢

三月滑國王厭帶夷栗陀始遣使獻黃獅子白貂裘波斯錦等物周古柯國滑旁小國也使使隨滑來獻方物
呵跋檀國亦滑旁小國也使使隨滑來獻方物胡密丹國亦滑旁小國也使使隨滑使求獻方物

四月河南王遣使獻方物

是年于阗利國復遣使獻方物

二年十一月百濟國遣使朝貢

三年八月婆利國白題國各遣使獻方物

是年婆利國王頻伽遣使珠貝智獻白鸚鵡青蟲玳瑁
瑠璃器吉貝螺杯雜香藥等數十種

四年十二月狼牙脩國遣使獻方物

五年末國主安未深盤遣使來貢獻

七年正月滑國二月河南王三月高麗國六月林邑國

並遣使獻方物

大通元年三月林邑國獅子國十一月高麗國王並遣使獻方物

是年盤盤國王使使奉表曰揚州閩浮提震旦天子萬善莊嚴一切恭敬猶如天淨無雲明耀滿目天子身心清淨亦復如是道俗濟濟並蒙聖王光化濟度一切永作舟航要聞之慶善我等至誠敬禮聖天子足下稽首問訊今奉薄獻願垂哀受

二年正月芮芮國遣使獻方物

中大通元年二月芮芮國遣使獻方物

十二月盤盤國遣使獻牙像及塔并獻沉檀等香數十種

二年六月林邑國扶南國並獻方物

三年六月丹丹國遣使奉表曰伏惟聖王至德仁治信重三寶佛法興顯衆僧殷集法事日盛威容嚴整朝望國軌慈愍蒼生八方六合莫不歸服化鄰諸天非可言

喻不任慶善若斯奉見尊足謹奉送牙像及塔各二軀并獻火齊珠古貝雜香藥等物

九月狼牙脩國奉表獻方物

四年四月盤盤國十一月高麗國並遣使獻方物

五年正月河南國七月波斯國九月盤盤國並遣使獻方物

六年三月百濟國七月林邑國並遣使獻方物

八年盤盤國遣使送菩提國真舍利及畫塔并獻菩提

樹葉詹糖等香

大同元年三月高麗國滑國薩丹國各遣使獻方物丹
丹國遣使獻金銀瑠璃雜寶香藥等物

四月波斯國七月扶南國並遣使獻方物

四年三月河南國芮芮國並遣使獻方物

五年八月扶南國遣使獻生犀及方物

六年五月河南王遣使獻馬及方物

八年八月盤盤國遣使獻方物

是年林邑國遣使獻方物

七年三月高麗國百濟國滑國九月芮芮國並遣使獻方物

是年于闐國獻外國刻玉佛

中大同元年八月渴盤陀國遣使獻方物

簡文太清三年十月百濟國遣使朝貢

太寶二年八月盤盤國獻馴象



冊府元龜卷九百六十八